

廣州府志卷一百二十一

列傳十明順德

譚漢

黃友信

區賢

何淡從弟經李聰

羅顯韶子子房羅顯庸

伍善

麥成

區世榮

鄧珩

龍敏

張泰

梁昉倫善

陳珽

何昌孫宏鰲曾孫光鰲子思

張善昭

康麟

梁文冠子景行景孚

黃澤

趙善鳴

李孔修

廣州府志卷一百二十一

列傳十

李瑜

張希載

鄧翹鄧琪

鄧德昌

黎暹

何珖

梁魚

梁儲孫孜孜子紹裘

陳綬

梁奎

蘇葵弟仲履中

黃著子啟讓孫在裘在裘

鄧炳鍾華

鍾曉子干

洗光

洗文淵黃璋

鄭應新父翼子用淵

劉士奇

梁億

余經

何瑜

阮珩余尚卿尚卿子光裕

區瑞

鍾善經

張潔

張拱辰

王鳳靈

何彥

羅萬里

弟萬程 關祺祖

張纓

弟綱

明

譚漢順德人性訐直而篤孝父母伯叔俱早喪惟叔母蕭在漢年踰四旬率婦與弟事之如所生歷三世一門四十餘口同居其爨庭無間言

據廣州人物傳修

黃友信永樂間爲理問所吏讀儒書考滿赴部冠帶從征甘

肅自募驍勇屢立戰功士庶感戴績聞于上超遷河南道御

史轉工部員外郎

據黃通志修

區賢字德夫西潞人永樂二十一年癸卯解元宣德五年庚

戌進士授南京戶部主事歷官九載卒于任比卒而正郎之

廣州府志卷一百二十一

列傳十

二

命始下居官清介嚴于取與居家仍故素身後不能庇其子

孫都人士咸仰慕之崇正間其姪孫龍正始構祠以祭

據張府志

何淡字中美葛岸人正統二年丁卯鄉薦天順

元年即景泰八年

丁

丑進士除知山東濱州適蝗旱且多無名之徵淡至以勸相

耕農爲首務定糧役料物以貧富爲差書爲由帖預給之聽

以粟麥布絹通融折納其病民者一切罷之及期不待督而

賦集暇取呂氏鄉約教民每鄉慎選老人親爲演說以訓其

閭里按季查考民以惡聞則召其鄉老泣謂之曰吾不能化

若與若不能化鄉其罪一也然吾則罪首也民苟三犯吾當

自劾求退于若何如各慚謝而去訟爲之稀例得皂隸馬夫

折薪錢悉移應公務乃新學宮修禮器延聘師儒聚民之秀

者教之初士習鄙悍解額荒甚自是科第煥赫甲于他州巡

撫賈正疏淡異等請書姓名于御屏堪備京堂之闕有旨旌異輿論稱其廉明仁恕所定徭役後守宗以爲法丁內艱去士庶醵錢二十萬謀踰境送之鄉老余良勝輿至臨清致賸淡正色却之良勝負還散于眾不匿一錢蓋化于淡也後貌淡像祀諸龔遂祠服闋入爲工部虞衡員外郎奄人請託不行陞湖廣漢陽知府郡多魚利民爭訐又爲親藩所擾悉奏革教民力田爲築陂堰使灌溉江右布商誘民取倍息與訟相讐殺痛繩之民始安居尤重學校所教士多取科甲前此未有也民歌之曰何太守築漢陂飢得食寒得衣陞貴州左參政時生熟苗相攻郡縣騷然巡撫議用兵淡請招之會朝命下如淡言巡撫卽檄淡往淡單騎深入諭以威德遂釋甲返故土以親老乞歸時年纔五十餘與從弟副都御史經內

廣州府志卷一百二十一

列傳十

三

弟參政李聰同時致仕人以爲難淡居官三十年家產無所增貧至不舉火晏如也暇課僕種園蔬以自娛卒年七十五從弟經字宗易景泰五年甲戌進士成化初爲工部郎中荆襄盜起經從尙書白昂征之親犯矢石獲賊首劉千斤又追捕渠黨石和尚于西蜀嘗劾侍郎霍宣宣罷職踰年擢貴州左參政土官金鐸不法經奏執之陞雲南右布政土官昂貴謀爲不軌平治之陞貴州左布政時兩廣大軍征荔園諸蠻經獨當一面且攻且守諸峒悉平陞右副都御史撫治鄖陽民有此老如何不早來之謠致仕歸所著有平蠻集南遷稿京行百詠和兩廣觀風集督撫三藩等稿藏于家李聰字士達父德彰好學不倦謙厚自持善醫每以藥濟人不責其報正統己巳之亂眾推保障遂據險立柵極力捍禦賊攻北村

率眾援之斬獲無算民賴保全竟不言功聰爲人曠達樂易不立厓岸成化二年丙戌進士授南京江西道御史成化間孝宗龍潛聰率先疏請立儲貳以定大本上意遂決旣冊立賜以綵緞尋陞嘉興府知府丁內艱起補饒州府湖水爲患築堤捍民民稱爲李公堤雨暘失節爲民祈禱無不應民居被焚躬行救護須臾返風滅火有虎入城傷人禱于神擒虎殺之人以爲異陞廣西參政未幾上疏乞休時年五十二知縣吳廷舉扁其堂曰見一卒年八十有四

據黃通志順德志修

羅顯韶字九成大良人簡默多智略正統十四年己巳時有黃蕭養之變避兵端州明年賊誅侍郎揭稽鎮廣顯韶與鄉耆羅忠兄顯庸等詣軍門上書請置縣其畧曰忠聞失大小之權者不可與言智昧遠近之利者不可與言謀故善智者

廣州府志卷一百二十一

列傳十

四

圖見于大善謀者定計于遠見大故能察微而知著計遠故能因亂以成功伏見邇者黃賊之變起自亡命擅帝號攻城邑潰走王師禍可謂烈矣當此時黃賊嗥嘯而數境之民風靡應援譬諸禽獸一個負失百羣俱奔非其習有懞悍之積性有樂死惡生之逆也然而負不義之名以犯誅戮者何也今夫素之質白染之涅則黑失其體也金之性沈托之于舟則浮勢有所支也民之從亂猶素之染涅也得所恃則泊猶金之托舟也然近年諸司諱言實旣治慕空名撫字無恩防禦不肅故逞欲逞求者兆爭攘之端也姑息長寇者豐禍亂之道也任情飢法者賈苛刻之怨也是以上無固結之仁下懷離潰之志外無城郭之備內怵逼脅之勢漢人有言穿窬不禁乃致強盜強盜不斷乃爲攻盜蓋成于漸也此忠所謂

著微之機治亂之候者也然欲樹長畫而伐禍本則莫若置縣昔周王建洛邑本殷頑而思治齊桓城楚邱緣衛難以爲功故政惠而不費民勞而不怨何則以其圖見于大而能定計于遠也今大良其地遠于南海然西有排榜之峙東有迎暉之環前擁華蓋後鎮棋北山原如翼河流若帶此澤國之形勝也因其地而置縣域以封疆防以城池治以官師聯以戶口齊以科教如此雖復有黃賊之變無能爲矣其樹長畫伐禍本之道計無易此乃議者或曰兵荒之費無所出殘傷之民不可役是習瑣瑣之細非可與論于大道也夫扁鵲治病以刀刺骨雖有小痛而長利在身君子振亂用民爲役雖負時怨而久福在國故甚病之體以忍痛爲利暫勞之民以永逸爲福故曰前事者後之鑒惜小者大之費惟執事者圖

廣州府志

卷一百二十一

列傳十

五

之于是侍郎嘉納竟奏行其後民無兵擾者八十年顯韶忠庸等之力也景泰初有司治賊之餘黨鄉民陳琛等坐誣將戮顯韶曰治盜本以安民乃用誣而枉誅戮何哉詣有司力諍得釋顯韶之妻家沒于賊鄉豪爭籍其產分予之顯韶曰乘人哀而利取吾不爲也竟不受知縣周亶治稱廉平卒官不能歸顯韶捐十金爲助于是鄉人爭持金爲賻其好義蓋天性然也別號東澗人因稱東澗義士縣大夫過式其閭咸比之龐公焉及卒郡高士唐璧爲東澗賦巾之子子房字宗傑成化十六年庚子舉于鄉明年會試不第歸築卧愚亭奉母爲樂母卒執喪盡禮尙書吳廷舉治縣時聞其賢數諮問民間利病子房棘棘言之縣積疑獄囚乞鞠不已廷舉無以自決曰安得宗傑言可決也人詣其所請言子房不可及廷

舉以密叩復棘棘言如故人得理于官獻百金爲壽子房大
咤曰言時未知有子何得污我宏治八年復入京謁選知永
福縣永福故近邊地苦瘠耗習猾而俗夷且盜藪也至則覈
征租平徭役招流亡立城障戒巡徼實倉庾又葺廢墜禁巫
機崇禮興學治皆以廉先之初縣大猾張月麒縱其子殺徐
姓二子亡不得夕有二烏遶卧所號鳴怪之從走卒微行廉
知其狀遂捕月麒及其子棄市監司重之奏治行爲廣西第
一居無何乞致仕父老聞將歸走泣堂下歸之日無十金之
囊及卒子鬻其祖所置產爲喪葬具

據羅司勳集修

謹案明以來順德邑志立縣之書皆指爲羅忠作羅
天尺五山志林云先十世祖忠滄洲集有上揭侍郎
書則當時刻入已集非他人可混順德姚志有忠傳

廣州府志卷一百二十一

列傳十

六

殊簡畧陳志又有羅顯庸傳云與弟顯韶倡議建城
上書揭侍郎而不立韶傳至羅子房傳乃有父顯韶
與鄉耆羅忠等詣軍門獻書設縣語則是時忠與顯
庸顯韶同建議而書出自忠也順德志三人合傳阮
通志本粵大記以韶子子房較顯以書歸之韶又刪
去忠及顯庸名亦不實矣今從阮通志而補入忠與
顯庸名以昭信云

伍善古朗人賊至乞存病母賊許之使牧牛深箐中減所食
之半爲乾餼攜之逃歸食其母道阻于河禱天得附竹以渡
及家母尙存

據順德志修

麥成麥村人兄清菴爲賊執自赴賊所願以身代兄釋成竟

被戕

據順德志修

區世榮字蘭坡鷺洲人賊至其世母何以簪珥盡付世榮自抱子璉逃去事定世榮躬自行求偶經從化留溪洞遇婦貧兒汲者近之卽何母子蓋傭食他縣矣亟贖以歸悉還所付而分以祖產璉長何母戒勿忘兄德世榮亦以壽考終

據順德志

鄧珩水藤人正統己巳賊至其鄉焚掠珩父遇害兄弟奔散珩負母麥氏避難過烏柏涌遭刃傷足不能行賊殺之數日面如生兩目下有淚痕見者異之

據郝通志修

龍敏號松巖大良人正統末黃蕭養入境脅敏歸附敏抗義不屈偕二子淵源闔門八口同死止存幼子澈外戚何氏撫而育之澈子宣和宏治五年壬子舉人晉江令孫堯達嘉靖二十八年己酉舉人永定令

據郝通志修

廣州府志卷一百二十一

列傳十

七

張泰字叔亨甘溪人景泰四年癸酉鄉薦成化二年丙戌進士除知沙縣時經鄧茂七之亂泰撫綏招集流亡盡復入爲御史偕同官諫萬貴妃干政廷杖幾斃出督京畿學校以憂去家居十餘年宏治五年起故官按雲南孟密土舍思揲構亂以兵遏木邦宣慰使罕它法于孟乃砦守臣撫諭不聽泰與巡撫張誥集兵示必討思揲懼始罷兵滇池溢爲民災泰築堤以弭其患還朝乞罷織造內臣減皇莊及貴戚莊田被災稅賦給畿省災民牛種詔止給牛種餘不行寇入永昌甘肅遊擊魯麟委罪副總兵陶禎總兵劉甯疏言守臣不和詔泰往勘泰奏鎮守太監傳惠故總兵官周玉侵據屯田巡撫馮續減削軍餉寇數入莫肯爲禦失士卒六百餘馬駝牛羊二萬皆不以聞帝怒下之吏惠降內使錮南京續編氓口外

泰又言甘州膏腴地悉爲中官武臣所據仍責軍稅城北草湖資戍卒牧馬今亦被占請悉歸之軍且推行于延甯二鎮詔皆從之遷太僕少卿改大理初蘇州民田多爲牧馬草場所侵又侵御馬監及神機營草場皇莊貧民失業草場亦虧故額孝宗屢遣給事中周旋侍郎顧佐熊翀等往勘皆不能決至是命泰偕錦衣官會巡撫周季麟復勘泰密求得永樂間舊籍參互稽考田當歸民者九百三十餘頃而京營及御馬監牧地咸不失故額奏入駁議者再尙書韓文力持之留中未下及武宗嗣位文再請始出泰奏流亡者咸得復業尋遷右副都御史督儲南京奏釐革十二事多報可正德二年召爲工部右侍郎踰年遷南京右都御史泰清謹劉瑾專權朝貴爭賂遺泰奏表至京惟餽土葛瑾憾之其年十月令以

廣州府志卷一百二十一

列傳十

八

南京戶部尙書致仕明年七月卒撫他事罰米數百石瑾誅予葬祭如制泰謙和孝友兄順庶出母欲薄分其產泰泣諫均分從之夫妻相待如賓每見必揖至誠接物未嘗言人過失喚僮僕不加聲色儉約自刻官至六卿先產不增毫末蓋

其所養有素矣

據明史本傳黃通志修

梁昉字景熙石碕人博學強識景泰七年丙子解元天順元年丁丑進士年甫弱冠授蕭山知縣禮賢與學疏言致仕尙書魏驥年近期頤請賜存問從之陞雲南道御史擢浙江僉事監試得狀元謝遷爲舉首平生冰蘖自持執法不阿卒于官無一錢尺帛以遺子孫同鄉倫善字國寶景泰七年丙子鄉薦成化十一年乙未進士令龍溪有學有守民愛之如父

母

據黃通志漳州志修

陳珙龍山人天順三年己卯鄉薦成化五年己丑進士選庶吉士授監察御史時宦官汪直莞西廠訶詈京師橫肆羅織商輅項忠疏罷之御史戴縉上言汪直功德不宜罷復用事未幾戴縉遷都御史珙與同官郭和上疏曰汪直奸邪小人竊弄威權締結朋黨紊亂朝政擅起邊功皇上頃罷西廠人心大快今復令直提督其勢益張天下但知汪直而不知皇上請將直正典刑以爲奸邪之戒上優容之巡按雲南討巨賊賑飢民撫叛夷歸侵地有王射者藉汪直詐稱使者至滇珙械歸于京師而鎮守太監錢能直黨也其事珙未嘗不側行踧踖然珙氣盛弗爲禮會能掠取鎮內寶石子女及納夷賄許以土地印信諸不法珙遂劾能與直朋邪相倚害民啟釁直等齟齬其間逮珙論治謫戍居庸子應科上書訟冤杖

廣州府志

卷一百一十一

列傳十

九

于午門外及科道論救乃放還田里是時珙直聲聞天下當

塗甚重之

據獻徵錄郭通志郝通志修

何昌字克昌黃連人明初法峻人莫肯爲郡縣學生有與昌父怨者籍其兄爲縣學生昌曰朝廷建學育才才能者登庸貴矣何免爲遂代其兄爲南海學生後南海分立順德遂爲順德縣學生天順三年己卯領薦筮仕浙江麗水縣鄰邑有劇寇鄭亞八者流劫爲害密捕擒之一郡獲安丁憂歸民不忍舍服闋補任宣平宣平故麗水分也道出麗水民爭迎焉邑方草創乃修學宮置祭器繕公署樹坊表嘗請減坑課辦額歲銀千兩兩邑民戴其惠人覲者績居最力求歸與大參李聰友善邑令吳廷舉重之年七十卒後宣平人潯州來爲清軍御史立遺愛坊以表之孫宏發號宏字道充舉正德二年

丁卯鄉試九年甲戌任通州學正待庠生嚴而有恩于禮餽有無厚薄不計試諸生輒自具饌業成者進之蔬而嬉者弗貸鞭責士用感勵嘗有當道按臨責其禮節挫抑之宏弗屈提學御史林有孚以行檢繩師儒鮮當意者獨重宏及聞以憂去惜不獲見之宏在官五年革弊甚多其法至今可守丁憂服除補泰州學教如通州歲飢巡撫發廩遣其弟子監之曰何先生弟子必不欺也尋轉六合縣令均民役闢浮屠禁奇袤淫靡之習有貴戚與豪民訟必弗決刑部以宏往決之溧陽民坐殺人拷死相繼不白宏白之嘗具獄上御史田頊三反宏三執人爲宏危頊竟薦宏後爲南京御史首疏銓曹弊事終德安知府踰年致仕呂柟爲作去思祠碑記極稱其賢鰲字子魚宏治十七年甲子弱冠魁南粵正德三年戊辰

廣州府志卷一百二十一

例傳十

十

登進士知慶元縣慶元在萬山中獷悍難制豪猾持吏短長鰲至取首惡誅之治甚有聲召爲御史佛朗機以入貢爲名兩臺不許遂治區脫東莞之南頭潛至京師見部不拜朝欲位先諸夷鰲與御史邱道隆奏驅之出境按湖廣持大體擢守松江副使浙江

黃通志云嘉靖庚寅進山東副使

改徐淮兵備定驛傳約

法歲省數萬築堤自沛至徐延亙百里河不爲害擢福建左參政湖廣左布政卒鰲字子時弱冠以文名督學魏校器重之嘉靖元年壬午以禮經魁鄉試八年己丑復魁南省進士授兵部武庫主事督教武學有勢家人武學察其冒籍黜之勲胄斂戢尋移疾歸養當路造其廬咨詢民瘼靡不悉其肯綮邑人陰受其福而不知其自也別駕沈文淵貧不能葬邑博士滕鳳客死廣州不能歸皆白于當道資遣之嘗立祖祠

以睦族出義穀以恤隣里人多稱之撫按先後九薦不起年六十卒所著禮經劄意藏于家思贊翁子字紹襄原名思聰嘉靖二十八年己酉鄉薦改思贊明年庚戌二甲進士授南戶部主事歷員外郎中遷梧州守練達有聲隆慶初擢福建鹽運使商人供應悉却不受滿三載辭官歸晉階大中大夫優游林下三十載年八十二卒曾孫光歲貢高要訓導廉恕有祖風

據阮通志修

張善昭字彥光龍山人天順六年壬午舉于鄉入監試吏部授兵部司務尙書余子俊甚才之嘗條陳選法臺官惡其越俎而中之不可得選例官部首領者歷三考乃得敘遷善昭未滿九載超擢四川按察司僉事不常有也以治屯田事終爲臺官所揭左遷鳳陽通判改判臨江先是練子甯姻戚逮

廣州府志卷一百二十一

列傳十

士

成臨江者八十餘人善昭上疏曰子甯忠貫日月太宗謂若子甯在朕固當用之仁宗亦謂方孝孺等忠臣夫旣忠之矣何外親末屬尙以奸惡賜配百年不宥哉乞復其家疏雖不行中外皆壯之尋致仕歸孫潔別有傳

據順德志修

康麟字文瑞龍江人妙觀子禦黃寇之役麟爲諸生與戮力焉景泰四年癸酉舉于鄉明年甲戌成進士以御史巡按關中發奸摘伏如神辛巳出爲福建僉事提督屯田按伍覈畝歲增子粒二萬五千八百餘石報績賜敕褒美所部指揮四人同犯法麟廉得狀實將窮治之行賄求免竟置之法有冤獄人繫審脫其罪獻百金亦卻之自以剛直忤物尋謝歸署所居曰介軒陳獻章賦介軒詩以贈居恒工詩著雅音會編十二卷集唐什以韻編類藝林稱焉又著世教錄卒祀鄉賢

梁文冠字華卿鼎新人先從陳獻章遊因率其二子景行景平學焉文冠館于白沙碧玉樓獻章名曰見玉謂碧玉也數年不返日見意趣詩學益進景行字宗烈見獻章聞勿忘勿助之旨益潛心正學宏治二年已酉鄉薦知崇明歲飢請發倉賑之活者數萬邑多盜海上桴鼓盡鳴會有執盜至者釋令迹捕宿盜盡擒婦女惑于巫祠宿求嗣因為奸收按誅之毀祠為社學故事令有荻稅入私橐景行以給諸生膏火朝廷采木荆南道崇明司木者檄費十餘萬景行爭之省五六萬又請減馬糧之半諸雜俱盡革之改晉江未赴丁內艱服除不起都御史吳廷舉薦景行可京官及郡守兩廣巡撫張鼎亦薦可侍從風憲皆不報後廷舉巡撫應天又以郡丞薦

廣州府志

卷一百二十一

列傳十

三

乃除鎮江府同知相國楊廷和假子殺人論死楊一清時寓鎮江為請罪降一等不聽上驗聖學察黨與廣分封嚴內侍蠲逋負比什伍六事于朝遷壽府長史歸蓋二楊所頤指也景行孝待異母弟怡怡如也有司欲為治第固辭獻章嘗題其天壺書屋曰打土編茅費幾錢白雪深夜一燈懸知君不
是壺山主只借壺山過兩年蓋以范希文邵堯夫孫明復胡安定四公期之也所著壺山集十卷傳于世景字宗正獻章有和景字遊山詩景字聘妻獻章助穀三十斛

通志順德志修

黃澤字曰兩石碕人

順德志字若雨

宏治五年壬子解元明年癸丑

成進士嘗從陳獻章學獻章聞澤發解有詩笑領春風第一
花文章誰敢傍飛沙狂歌欲買花前醉不怕無錢付酒家澤

性豪舉博學工詩善真草書初計皆同舉人何欽燮僮僕盡

死澤獨負欽至館省治踰旬而愈人義之

據白沙弟子傳順德志修

趙善鳴龍江人少孤每誦白沙詩心輒馳慕成化十一年拜

門下宏治十四年辛酉舉人仕南京戶部員外郎陞知府工

書法行草入神品爲世珍寶稱丹山先生

據白沙弟子傳西樵遊覽記修

李孔修字子長大良人自號抱真子僑居廣州之高第街混

迹人羣闐闐不識也張詡薦于陳獻章孔修遂往江門師焉

獻章亟稱之名由此著孔修常輸糧于縣縣令異其容止問

姓名不答第拱手令叱之曰何物小民乃拱手耶再拱手令

怒咎之五竟無言而出有庶母父歿改適誣孔修奪其產縣

鞠之孔修操筆置對曰母言是縣疑焉得其情乃大禮敬素

家貧做廬薄產蔬食不繼未嘗鬻眉詩字不履前人自爲戶

廣州府志卷一百二十一

列傳十

三

牖或觀山水歸而圖之見者爭愛而酬之攻周易城中兒童

婦女皆稱曰子長先生間出廬戶則遠近圍視以爲奇物吳

廷舉由縣令厯藩臬在粵最久與孔修爲布衣交兩人高風

在塵埃之表粵人常道之此兩人亦相成也孔修卒無子憲

使李中少參王洙經紀其喪尙書霍韜葬之西樵山志其墓

曰白沙抗節振世之志惟子長張詡謝佑不失或問子長廢

人有諸陳庸曰子長誠廢則顏子誠愚庸與子長同師故相

信如此萬厯乙未祀鄉賢子長善屬詩有月明海上開樽酒

花影船頭落釣簑之句爲獻章鑒賞云

五山志林王中秘文集有與李伊合書云

吾鄉李子長先生醇謹端慤聞其亦有妻每食必舉案醵

梁伯鸞爲人吾因輯其詩歌以繼五噫當國家無事時天子

三年一舉士士之賢者無論懷才抱義皆得試于有司有司

擇其賢者上之天子爲鄉舉士試日有司坐大門左諸生頭

伏嚙嚙足緣行衣單衣披髮纓聽點官督軍牢軍牢雁行持

火杖督諸生頂至踵無不轉換掀揭破除其夾襪積弊時子

長年方少將詣院奮然不悅曰朝廷至大何若是疑士士至小以不肖相視此豈朝廷所以待士耶即棄硯去不復入後有司聞其賢乃于貢院旁築擲硯亭今伊令子長曾孫也醇謹端慤有祖風時天步艱難已棄儒冠不復仕僕去年春交伊合因懷子長期相與遊黃山約三十六峯結茅其上羅天尺曰吾鄉皆博子長先生無妻今聞王中秘書乃有伊合爲聞孫其非無後人可知又曰子長嘗從白沙先生講學得無欲之旨操行廉潔人不可得而衣食之布政使朱英餉米二十餘石固辭不獲乃悉舉所有瓶盎盤匱之屬以貯米纔容一二石許餘則不受遇空輒畫貓兒賣之毛骨如生鼠見驚走其山水翎毛亦精絕人爭寶重然皆不肯多畫平居大帽深衣人希見其顏面間出擇地乃蹈遇雨輒拱手徐行人曰先生何不趨雨凍透衣矣曰前路豈無雨耶行益從容人皆笑之晚于道深造年九十餘無疾卒今西樵祭社以子長配爲社師云 據粵大記獻徵錄郝通志順德志修

李瑜字伯溫鼎新人年二十進邑庠補廩從陳獻章講學江門每事悉循獻章教篤志有爲改過不吝雖淡薄自甘而志在濟人獻章推重之以吳康齋所書雪竹作讚以贈之表其高尚與湛若水相友善同處白雲洞上遊莊凡十年窮達各

廣州府志卷一百二十一

列傳十

古

行其志力學至老不休年八十有二卒若水臨墓致祭輓詩

作傳大司農張泰少司成周賢宜各有表銘刻于石

據順德志修

張希載字博之龍山人從遊陳獻章嘗誨之曰君子之心常

存恐懼于善有未遷于過有未改恐生懈怠于靜曰惺惺于

動曰惺惺恐生冥醉湛若水曰昔遊白沙惟柏山張子學有

端緒柏山即希載也正德年間貢教諭攸縣性和藹而不肯

詭隨士薰其德不嚴自化云

據阮通志修

鄧翹字孟材龍江人善墨竹以正德歲貢教諭浮梁陳獻章

答翹送晚菊詩曰氤氲何處送花舟歲晚相看碧玉樓笑把

一盃花亦笑年年公酒爲花留鄧琪亦順德人

據阮通志修

謹案明新會志所編弟子傳有鄧琪無鄧翹舊順德

志張希載與鄧翹鄧德昌合傳而不及鄧琪豈翹即

琪耶侯考

鄧德昌字順之水藤人篤學居西樵築鐵泉精舍讀書其中湛若水極相推重晚年以其學授傅明應稱賁齋先生德昌司訓最有名聲祀應天名宦祠云

據阮通志修

黎暹字景升鷺洲人穎博能文成化元年乙酉領鄉薦卒業胄監爲祭酒邱濬所稱授金華府同知當道有述作必出暹手罷歸構羅江書院吟嘯其中凡頌德勒功哀誄銘表之文人多求之一時薦紳皆以爲莫及有求誌生壙者以腴田百畝爲壽誌成竟返其券垂老命工像其貌于書院又自誌其墓其曠達如此有草庭藁藏于家

據黃通志修

何珖桂圃人成化四年戊子鄉薦十一年乙未進士知桐廬縣立三限催科之期禁吏卒下鄉之擾剖決中理吏不敢奸

廣州府志卷一百二十一

列傳十

七

閱四載以才行超卓擢監察御史

據浙江通志修

謹案順德志云官參政又南海志云爲梧州知府平易近人民不忍欺但載鄉科戊子不書會科何也

梁魚字克龍龍頭人成化七年辛卯舉人知平樂縣平樂縣小役煩魚至比籍均役草田之賦蠲之善撫徭徭治甚有聲遷賓州知州思恩土官岑濬爲逆奉檄往諭濬進兼金不受也後爲部使者所斥拂衣歸使者愧謝留之不可賓民思之

據粵大記修

梁儲字叔厚初號厚齋更號鬱洲石碕人生有異質自幼穎異不凡篤孝友父祖順奇之弱冠博學能文受業陳獻章舉成化十年甲午鄉試十四年戊戌會試第一選庶吉士授編修尋兼司經局校書侍孝宗東宮講讀二十三年丁未充會

試同考官丁兩艱服闋纂修實錄宏治四年進侍講改洗馬
五年壬子主考順天九年侍武宗于東宮十一年戊午兼翰
林院侍講主考應天是年冬充正使冊封安南却其饋八之
擢翰林學士十四年辛酉主試順天王戊奉詔教庶吉士十
六年三月同修會典成遷少詹事拜吏部右侍郎奉命充正
使冊封魯藩正德初改左進尚書兼翰林學士專典誥敕掌
詹事府纂修孝宗實錄爲副總裁正德三年戊辰主會試劉
瑾摘會典小疵謂其壞祖宗制書雜以新例儲坐降右侍郎
孝宗實錄成復尚書尋加太子少保瑾猶憾不已欲中危禍
無由傳旨改調九月調南京吏部瑾誅以吏部尚書兼文淵
閣大學士入參機務儲既至進武英殿大學士加少保兼太
子太保時兵部尚書彭澤討賊有功反得罪力辨其誣曰有

廣州府志

卷一百二十一

列傳十

六

功不錄復加罪非社稷之福也後澤止免官七年壬申冬四
方盜平加恩宰輔屢加少傅兼太子太傅謹身殿大學士辭
恩蔭再三乃受進建極殿九年甲戌再主會試十年二月楊
廷和遭喪去儲爲首輔進少師兼太子太師華蓋殿大學士
時方建乾清坤甯宮又營太素殿天鵝房船塢儲偕同官靳
貴楊一清切諫明年春以國本未定請擇宗室賢者居京師
備儲貳之選皆不報其秋一清罷蔣冕代之至明年貴亦罷
毛紀入閣帝好微行嘗出西安門經宿返儲等諫不聽然猶
慮外廷知是春從近侍言召百姓至左順門明告以郊祀畢
幸南海子觀獵儲等暨廷臣諫皆不納八月朔微服從數十
騎幸昌平次日儲冕紀始覺追至沙河不及連疏請回鑾越
十有二日乃旋儲等以國無儲副而帝盤遊不息中外危疑

力申建儲之請亦不報九月帝馳出居庸關幸宣府命谷大用守關無縱廷臣出由宣府抵大同遇寇于應州幾殆儲等憂懼請回鑾益急章十餘上帝不爲動歲除竟駐宣府當是時帝失德彌甚羣小竊權濁亂朝政人情惶惶儲懼不克任以廷和服闋屢請召之廷和還朝儲遂讓而處其下鳳陽守備中官邱德及鎮守延綏甯夏大同宣府諸中官皆乞更敕書兼理民事帝許之儲等極言不可弗聽十三年七月帝從江彬言將徧遊塞上託言邊關多警命總督軍務威武大將軍總兵官朱壽統六師往征內閣草敕閣臣不可帝復集百官左順門面諭廷和冕在告儲紀泣諫眾亦泣帝意不可回已而紀亦引疾儲獨廷爭累日帝竟不聽踰月帝以大將軍壽肅清邊境令加封鎮國公儲紀上言公雖貴人臣耳陛下

廣州府志卷一百二十一

列傳十

七

承祖宗業爲天下君奈何謬自貶損既封國公則將授以誥券追封三代祖宗在天之靈亦肯如陛下貶損否況鐵券必有免死之文陛下壽福無疆何甘自菲薄蒙此不祥之辭名旣不正言自不順臣等斷不敢阿意苟從取他日戮身亡家之禍也不報帝遂厯宣府大同直抵延綏儲等疏數十上悉置不省秦王請關中閒田爲牧地江彬錢甯張忠等皆爲之請帝排羣議許之命閣臣草制廷和冕引疾帝怒甚儲度不可爭乃上制草曰太祖高皇帝著令茲土不畀藩封非吝也念其土廣饒藩封得之多蓄士馬富而且驕奸人誘爲不軌不利宗社王今得地宜益謹毋收取奸人毋多蓄士馬毋聽狂人謀不軌震及邊方危我社稷是時雖欲保親親不可得也帝駭曰若是其可虞事遂寢十四年己卯以一品滿九載